



栗谷全書 十七

神道碑銘  
墓碣銘

卷二十七

~ 16  
2426  
17



和  
2426  
37-17

栗谷先生全書卷之十七目錄

神道碑銘

左議政貞愍安公世純神道碑銘

大司憲成公世純神道碑銘

左參贊趙公彦秀神道碑銘

刑曹參判崔公應賢神道碑銘

禮曹參判李公澤神道碑銘

知禮縣監錫神道碑銘

穩城府使士貞神道碑銘

正言直孫神道碑銘

墓碣銘



獻納李公致墓碣銘

內資寺僉正申公汝樑墓碣銘

宗簿寺正盧公慶麟墓碣銘

漢城府庶尹洪公以坤墓碣銘

奉教李君喙墓碣銘

贈參判朴公世貞墓碣銘

宣務郎朴公宗文墓碣銘

淑人宋氏墓碣銘

栗谷先生全書卷之十七

神道碑銘

左議政貞愍安公神道碑銘

中廟戊寅之歲三公袞一博咨熙載于時羣賢滿朝  
清議張甚奴視流俗士僉曰吏曹判書安瑋其人遂  
相安公公字彥寶系出順興麗朝有文成公裕學行  
名世公八代孫也高祖開城留後景質公諱瑗曾祖  
海州牧使 贈吏曹判書諱從約祖檢校漢城尹  
贈議政府左贊成諱璟考成均館司藝 贈議政府  
領議政諱敦厚妣貞敬夫人密陽朴氏司藝融之女  
也公弱冠陞上舍明年登第是 成化辛丑歲也越



三年癸卯薦補史官年少貌弱而氣度夙成 成廟嘗稱兒長者及以父喪去位 上曰比久不見兒長者蓋眷顧也由藝文館奉教歷侍講院司書全羅都事刑工二曹正郎凡十一遷守司贍寺僉正 弘治丙辰湖南歲侵民飢公以成均司藝奉使往賑巷存家撫民賴以蘇丁巳爲司憲府掌令因隕石之變直諫燕山時燕山惑尙未深雖忤得不誅戊午遷司贍副正移司成己未陞司導寺正庚申廷議以西鄙驛路凋弊擇幹臣以公察訪大同道公櫛垢按痛科條簡便平壤府嘗侵驛卒公控監司請止累言不見聽公翩然棄官歸監司追謝至懇乃還卒遂公志吏卒

相傳歎美癸亥由軍器寺正拜南陽府使燕山屢興大侵不堪命公區畫有方瘁己保民闔境無擾己丑陞通政 正德丙寅 中廟拜公大司諫時諫院既廢還設公明練典故悉復盛時規模丁卯以承政院右承旨陞嘉善遷左承旨出按忠清道昏政之餘詞訟倍常公折以片言案無留簿風采所臨州縣肅然由己巳迄辛未歷工刑禮三曹參判而四長憲府凡廢朝枉死之家伸冤殆盡再拜兵曹參判皆以不曉邊務辭壬申觀察慶尙道吏民稱神明甲戌陞資憲判漢城府尹據法必行不以權勢撓民莫敢犯累遷戶刑工三曹判書乙亥判吏曹先是銓官注擬視託

屬高下如公薦及有功當祿者沈而不舉公慨然矯弊一斷以公關節不敢干趙公先祖及金湜金大有輩皆公所薦擢時議益推重 上之初立迫於勳臣廢正妃 慎氏輿情不快及 章敬王后之薨潭陽府使朴祥淳昌郡守金淨因求言抗疏請復廢妃大司憲權敏手大司諫李荇等詆以妄言請罪 上問廷臣僉曰議雖不中言者不可罪臺諫猶執不回遂抵二人罪公因入對極言二人無罪斥臺諫之誤臺諫因此攻公然物論是公臺諫竟被劾遞公誠於用賢政事不拘資格士林屬望而肉食多忌 上亦疑不守常憲公乃辭職戊寅進爵崇政拜左贊成尋還

長銓曹未幾登相位己卯士禍之作公與首相鄭公光弼協力申救而公坐為清流所宗免官明年奪爵公之子處謙憤南袞沈貞芟刈搢紳潛謀除 君側之惡時辛巳歲也其弟處誠與其庶姑子宋祀連告公公大驚欲執詣闕以 聞恐延傷士類乃率歸陰城邨舍以沮散其謀宋祀連恐事覺被禍乃詣政院告以謀害大臣袞貞等治獄極其鍛鍊構成大逆公竟坐被法大臣救不能解是年十月十七日也聞者寃傷之多流涕公生于 天順辛巳至是甲子僅一周矣公身貌不踰中人而莊重寡言笑清儉自律俸祿之外無他管守正奉公果於為義立朝多建明如

復 昭陵從祀鄭文忠追 贈金文敬鄭文獻設薦  
 舉科等事或主或贊公力居多故特愠于羣小難乎  
 其免矣貞敬夫人全義李氏慶源府使永禧之女也  
 配公三十八年婦道無違上下和順有三男曰處謙  
 處誠處謹己卯歲三子皆中薦舉科公與夫人愀然  
 不怡夫人曰樂極生悲此非慶也其年六月二十九  
 日夫人無疾暴逝十月葬于廣州退邨里越三年公  
 歿 嘉靖癸未二月始克葬于同里與夫人封相望  
 明廟丙寅歲追復官爵 萬曆乙亥今 上賜諡曰  
 貞愍處謙成均館學諭處誠官弘文館修撰處謹官  
 弘文館博士處謙處謹皆受極刑處誠獨免廢于家

庚子歲廷議雪冤處謙處謹妻子蒙 宥處謙娶宗  
 室玉堂副守壽長之女生三男一女男曰璐璵璿女  
 適士人許悌處誠娶宗親府典籤尹秀倫之女生一  
 男二女男曰玠長女適忠義衛權銖次適士人趙希  
 孟處謹娶司憲府監察安邦炯之女生二女長適敦  
 寧府直長鄭震次適士人禹弼成孫璐先娶宣務郎  
 柳淑蕃女生一男曰應達後娶宣傳官尹壽禧之女  
 生二男曰應建應進璵娶宗室昌原副守千壽之女  
 生一男二女男曰應吉璿娶宗室青原監賢孫女生  
 二男二女男曰應福應德玠娶宗室熙川守女生一  
 男一女男曰守基內外孫合曾玄見在者五十餘人

守基是大司憲白公仁傑之壻而珥兄子景震娶守基女故能知安氏一家事長孫璐求銘於珥珥重之不敢諾請累年不懈珥乃曰惟公事業載國乘炳炳可觀不待珥筆第墓必有碑且孝孫之誠不可負茲敢爲銘曰

粵天生材若將有爲載培載覆厥機誰司倚嘆中祖翊顛若時俊又彙征布列明廷維時我公爲國之楨擢陞黃閣允協輿情主張清議宗匠儒林羣黎是瞻袞職攸箴孰謂狐蜮潛包禍心一夜慝作百怪競侵舟覆半渡驥斃中路五精收彩三辰入霧天固有定太陽本明伸冤錫恩昭我令名鏡堅灼德永

無緇磷餘報未艾貽厥後人

大司憲成公神道碑銘

中廟之九年司憲府大司憲成公卒賜諡曰思肅卒後六十八年公孫徵君渾請銘於其友德水李珥曰先君具石求文之直而不華者迄未就子其筆以實俾無負先志珥辭不獲已謹按行狀以敘曰公諱世純字太純昌寧人昌寧之成載族姓書國初領議政諱汝完生禮曹判書諱石珥判書生左贊成諱抑贊成生漢城府尹諱得識於公爲王考自議政至府尹世襲大官惟公顯考諱忠達卒金浦縣令顯妣趙氏白川大姓復興君胖之後僉知中樞府事元壽之

女也公生于 天順癸未幼有遠志自力於學由甲  
 科發身再轉漢城府參軍治劇舉職大為朴判尹樅  
 所器不敢待以郎屬歷侍講院司書刑曹佐郎選入  
 弘文館為副校理累陞至直提學以內憂去位服闋  
 還拜典翰居經閣前後六年善講說多所啓沃時論  
 推重陞承政院同副承旨累遷右承旨辭以疾遷工  
 曹參議拜司諫院大司諫俄陞嘉善時燕山刻刑濫  
 及非辜一日將戮沈順門適賜羣臣宴闕庭公顧四  
 座曰諫官可無言乎兩司皆縮頸獨獻納金克成正  
 言李世應奮辭應公公笑曰事若不測吾三人當之  
 諸公色怍不敢違遂抗章論救雖不見省士議偉之

未幾觀察全羅道入拜戶曹參判 正德丙寅郊京  
 師賀聖節是年 中廟卽祚拜漢城府左尹歷大司  
 憲刑曹參判出按忠清道弊政雖革凋瘵未蘇公抑  
 痛爬痒民獲寧悒 召拜守知中樞府事秩視六卿  
 遂 贈公考縣令公資憲大夫吏曹判書蓋異數也  
 移參判吏曹復拜大司憲引大體持威重識者多之  
 甲戌正月得疾 上命內醫診視二十七日疾革移  
 簀卒于正寢享年五十二訃 聞輟朝一日弔賻之  
 禮有加公資敏而有局度造次無遽色遇事明果直  
 情而行待人信與兄弟友律身居官內外斬斬峻潔  
 少許可且不肯隨俗俯仰所與交惟鄭公光弼申公



自從  
用漑輩數人而已權政丞勻性倨客至不時見若聞  
公來必倒蹠而出其取敬於名流如此又不喜聲色  
家無妾媵卜宅白岳峯下公退嘯詠泉石閒蕭然若  
無爵者教諸子能以正有致大名者本於庭訓云以  
其年四月葬于坡州向陽里居愚之原配貞夫人光  
州金氏司僕寺正克愜之女左議政國光之孫也和  
順莊重公在匹美無違禮公歿善持家閨門肅穆後  
公三十九年以嘉靖壬子十月十二日卒于坡州  
牛溪邨舍年八十七明年閏三月附公墓男四人長  
曰守謹昌陵參奉次曰守琛有高識負抱不衍德望  
蓋一世卒贈司憲府執義墓銘是退溪先生之作

次曰守琮英特拔俗遊趙靜菴之門嘗及第被黨累  
削名歿後還給科牒金慕齋表其墓次曰守瑛繕工  
監副正女一人適郡守李殷雨先逝無子參奉有一  
男五女男曰濯直長女長適判書慎喜復次適進士  
姜瑞次適士人洪胤藩次適別坐李純臣次適士人  
金澹執義有一男一女男曰渾守先人業養病林下  
屢徵以憲官固辭今爲典設司守亦不拜女適直講  
閔忠道渾有男曰文濬女二皆幼及第有一男曰耳  
見爲縣監有男曰文漑副正有三女長適士人趙純  
善次適及第李彥忠次適士人趙禧男曰汲庶出也  
銘曰

剛不亢急溫而樹立技經肯綮迎刃解體遭時孔燬  
批逆售忠 王明受知祛銜有期壽不視德天奪何  
速媿以女士脉賢引社嗟躬之劬惟後之燾事遠或  
昧鏡堅是告

左參贊趙公神道碑銘

公諱彥秀字伯高漢山人遠祖諱岑仕麗朝官至判  
中樞院事判樞之曾孫曰文剛公諱末生大為 英  
廟所器重官至崇祿大夫領中樞院事於公為五代  
祖文剛之孫諱選是公會王考也官至府使 贈通  
政大夫兵曹參議王考諱壽堅官至縣監 贈嘉善  
大夫兵曹參判考諱邦佐初筮參奉早歿 贈資憲

大夫兵曹判書三代之 贈以公及弟士秀貴故也  
妣高靈申氏 贈議政府右議政諱洞之女公生於  
弘治丁巳十月壬申自幼聰警凝重頭角嶄然異羣  
兒見者期以遠器早喪怙恃繼丁王父母憂連年居  
草土幾不自保晚習科業 嘉靖辛卯始補上庠乙  
未釋褐年已三十九矣初授權知承文院副正字俄  
選入藝文館為檢閱遷承政院注書侍講院說書戊  
戌陞司書己亥遷兵曹佐郎尋轉吏曹佐郎天曹郎  
實士林極選也庚子病遽歷工禮兵正郎侍講院文  
學還授吏曹正郎時本曹堂上缺一長官欲擬以非  
人公陽不聞強之猶不應長官戲曰正郎聾耶竟未

得擬聞者服其有守癸卯遷議政府檢詳陞舍人甲辰轉弘文館應教陞典翰至直提學丙午陞通政尋爲同副承旨遷至都承旨丁未以孝陵升祔有事于太廟推恩陞嘉善戊申移戶曹參判俄拜弘文館副提學司憲府大司憲是年夏以聖節使如京師賜宴罷禮部尙書邀公私第曰人臣義無私交愛君德容越禮相見因贈以所著四書口訣公之風儀動人如此還國授禮曹參判漢城府右尹出按咸鏡道首訪孝子節婦及行誼者馳啓褒賞撫下以恩信得其歡心其還也吏民多遮道號泣壬子復出按江原道還入爲右尹遷刑禮曹參判丁巳順懷世

子在東宮廷議擇純慤老成之人任輔養之責公自是常兼賓客戊午遷吏曹參判兼同知春秋館事己未明廟特加資憲階拜漢城府判尹公固辭上批以御筆曰卿純宰也豈不合於判京兆乎卿陞亦晚矣其恩眷世罕有也庚申親政拜公刑曹判書有獄涉權貴久未決公折以片言大忤權貴以公無瑕可指故不得中辛酉暨隆慶戊辰五拜參贊六知樞府自己巳春杜門養疾罕接賓客萬曆甲戌疾甚以十月辛亥卒于第享年七十八訃聞今上輟朝二日賜賻祭如儀越三月葬于楊州金邨里先塋之側公資質眞醇器度寬厚平生無疾言遽

色不喜交遊公退還家門稀車馬身若無官且不爲  
崖異以取名於世故有文有行而人鮮克知嘗曰爲  
文當本於經學苟無其本文雖工何用其於四書三  
經讀之精熟故晚年誨兒孫猶口誦不錯花潭徐先  
生於公爲同年上舍豔慕不置每嘆曰吾榜有徐某  
可謂榮矣愛士向善是素志故自號信善堂其於勢  
利有所不屑見人脅肩諂笑若將浼焉性喜飲酒多  
而不亂醉必哦詩既老多詠趙元鎮白首何歸丹心  
未泯之句喟然者良久公有薄業在揚州欲引退而  
牽於家累未遂初心嘗次陶靖節歸去來辭以寓懷  
立朝四十年官至六卿而未嘗構一間屋買一頃田

先人舊宅亦未嘗修葺曰此此足以終吾身矣自奉  
儉素客至無氈身歿之後家無遺財可以治喪賴賻  
布爲斂葬之資清白一節公不多讓於古人矣夫人  
驪興閔氏忠義衛閔昌之女有男一人女四人男曰  
擴檢閱女長適郡守金士元次適監役黃廷秀次適  
朴貴元前尚瑞院直長次適李山海前司諫院大司  
諫擴生四男二女男曰存信存善餘幼士元生三男  
二女男曰汲前縣監曰浹進士曰浴女長適生員宋  
言慎次幼廷秀生二男一女男曰鷗參奉曰鵬女適  
徐益禮曹佐郎貴元生二男三女男曰姚賢妣賢女  
長適崔仁齡生員次適南楫奉事次適南復興山海

生三男三女男曰慶伯女適李尙弘餘幼內外諸孫五十三人珥與擴相從分厚因其請不敢以不文辭謹依李大諫所撰壙誌加彙括因爲之銘曰

淳風旣邈樸散生巧粉塗罅張皇微眇鋪飯門外腹實不飽維漢有人厥姓曰趙藏真蓄美不事皎皎積厚晚發平步雲程榮耀厥躬淡泊厥情儉不太固清不絕物人欽儀表未究心曲不知何患韜我醇質官登六卿壽臻八袞螽斯戢羽蘭玉競茁死生無憾天道不忒卜宅先壟撫原孔陽爰轟螭頭用昭幽光

刑曹參判崔公神道碑銘

嘉靖甲子冬珥省外王母在臨瀛崔公壽靖謂珥曰

墓有碑古也叔父參判公會爲祖考求銘于晉山姜渾親刻于石功未半而歿文又失火祖考卜兆迨六十年神道有缺吾死且不瞑子亦裔孫今以屬子非文之尙願志其實珥辭不獲免謹按崔氏寔江陵大姓公諱應賢字寶臣高麗重大匡慶興府院君必達之後也元世祖以高麗征日本也有諱漢柱從軍泛洋值颶風鐵碇拘於海底巖罅風纜欲絕舟人氣熄漢柱焚香告天願以一身贖衆命禱畢持錘及釘沈于不測孽巖拔其碇遂聳身以上則舟已不知所之有漂板得不死或傳乘鰲背出陸云鄉人立石紀事今在蔚珍縣崔氏之顯始此公其五代孫也曾祖諱

元亮官至三司左尹 贈吏曹參議祖諱安麟 贈  
兵曹參判考諱致雲以宰相材遇知於 英陵未及  
大用以吏曹參判卒妣貞夫人咸氏三司左尹諱承  
祐之孫縣令諱華之女以 宣德戊申四月三日生  
公生而聰慧早知讀書不好戲嬉斲然異羣兒 正  
統庚申公年十三丁外憂哀毀盡禮親執奠饌鄉黨  
稱孝服闋一意向學戊辰中司馬兩試 景泰甲戌  
擢乙科一人補承文院副正字公以大夫人在鄉不  
就京職常補江陵訓導例陞著作博士成均館典籍  
皆謝 恩卽還求補教授屢徵不赴壬午拜江原道  
都事周年乞郡養親歷高城寧越二郡守多惠政寧

越民願借者一年秩滿還鄉拜成均司成又不就  
成化庚子丁內憂廬墓三年一不到家過哀柴毀幾  
至滅性服將闋大臣咸薦其賢癸卯擢拜司憲府執  
義公固辭改司成未幾還拜執義歷禮賓奉常兩寺  
正松都有疑獄久不決 特遣公推問剖析明決  
成廟嘉之賜鞍馬丁未冬湖南捕水賊九十餘人又  
遣公治之咸得其情陞拜吏曹參議戊申拜同副承  
旨遷禮曹參議擢拜忠清道觀察使 教曰古語云  
求忠臣於孝子之門惟卿種學蓄材不求榮進倦倦  
愛日回翔郡寄者垂二十年既能盡孝其不能盡忠  
乎茲予眷卿有加無替卿宜體予悉心圖報己酉拜

大司憲辛亥遷同知中樞府事俄拜慶州府尹甲寅  
 拜同知事歷漢城府左尹丁巳復拜大司憲戊午嶺  
年以忤旨罷歸鄉里庚申還拜右尹歷大司憲工兵  
 二曹參判乙丑拜江原道觀察使辭以老改刑曹參  
 判兼同知成均館事五衛都摠府副摠管丁卯中宗  
 閏正月初五日以疾卒于第享年八十四月葬于江  
 陵助山某坐某向之原從先兆也公質美而文居家  
 孝友莅事精明清儉自律家無長物事母夫人須臾  
 不忍離側甘旨必經於手人以爲難公娶成均生員  
 南適女生五男六女男長曰世忠縣令次曰世孝生  
 員曰世節擢魁科戶曹參判曰世德縣監曰世道生

員女長適崔孝良次適生員李思溫次適僉知中樞  
 府事慎敦義次適參奉李馮次適參軍申守禮次適  
 直長柳世卿世忠娶銀溪道察訪金石堅女生三男  
 曰壽塘副司直曰壽靖老職嘉善大夫曰壽崙副司  
 直世孝娶直講崔鐵關女生四男二女男長曰壽喊  
 曰壽暢曰壽蒙曰壽嶷女適主簿申世熙次適參奉  
 元渾世節娶判官申淑澮女生二男一女男曰壽增  
 郡守曰壽獻參奉女適申渾世德娶生員朴元溫女  
 生一男二女曰壽嶸女適李孝貞次適柳宗仁世道  
 娶金匡弼女生三男曰壽岷曰壽噉曰壽喻孝良生  
 三男三女男曰舜齡曰春齡曰松齡皆忠順衛女適

生員村有文次適忠順衛慶績次適生員村彥忠思  
 溫生一女適進士申命和敦義生三男二女男曰希  
 崇萬戶曰希璟曰希晟萬戶女適金沃卿次適申德  
 應馮生一男一女男曰達亨別坐女適申誠美守禮  
 生四女長適縣監成子閏次適引儀蔡舜年次適慶  
 秀才次適判官崔濬仁世卿生四男一女男曰安江  
 曰安淮參奉曰安河曰安渭皆忠順衛女適李仁壽  
 公之內外曾玄孫今見存者無慮百餘人珥則申進  
 士外孫也銘曰

維天畀人曰孝與忠孰念厥初帝則是從烝烝我公  
 奉以周旋幹母之蠱愛日知年無人倚閭委身官家  
 澤聞于天寵光有加孝既無憾忠亦盡職絲絲瓜  
 瓞景命有僕瞻彼助山是焉幽宅孝孫有慶螭頭是  
 龜本厚源深未艾其福

禮曹參判李公神道碑銘

公諱澤字澤之鐵城世族麗季有門下侍中文貞公  
 諱岳號杏邨筆法妙絕與趙松雪相埒杏邨之孫諱  
 原歷事我太祖太宗世宗官至左議政為太  
 平宰相號容軒是公之高王考也曾王考諱輝官至  
 承文院參校王考諱陸兵曹參判善詩文有青坡集  
 行于世考諱嶠早歿以公貴贈兵曹參判妣昌寧  
 成氏節度使夏城君秀才之女以正德己巳九月



二十五日甲寅生公公生而異凡甫八歲失怙哭擗  
如成人稍長力學不倦嘉靖辛卯選補上庠戊戌  
中廟視學取士公始釋褐入承文院由副正字陞至  
博士辛丑陞成均館典籍兼承文院校檢公善寫事  
大文書故常帶承文之職歷工禮兵曹佐郎司諫院  
正言侍講院司書又歷工刑兵戶曹正郎侍講院文  
學司憲府持平弘文館修撰司諫院獻納乙巳丙午  
之間坐不傳時議遷置冗局者數年丁未夏六鎮凶  
歉朝廷方軫北憂以公有撫禦才由軍器寺副正授  
通政拜穩城府使己酉夏以病遽頗有去後思歷義  
州牧使僉知中樞兵曹參知轉承政院同副承旨陞

至左承旨乙卯特加嘉善拜咸鏡南道節度使厥後  
爲觀察使者七曰清洪全羅黃海慶尙咸鏡而再按  
京畿爲都承旨者一爲節度使者一曰平安爲漢城  
府左尹者一爲參判者二曰刑曹禮曹萬曆癸酉  
以禮曹參判謝病免是年九月二十九日丙午卒于  
第享年六十五訃聞賻祭如儀十二月辛酉葬于  
廣州葛麻里先塋之側公賦性溫平制行和易待人  
處事不設畦畛莅官尙廉謹在家崇儉約勢利芬華  
非所汲汲公退還家不喜交游官登亞卿巷無車馬  
如寒士家人或戲嘲無吝公曰無客眞吾樂也杏邨  
之後多以善書知名公筆勢豪健自成一家詩亦典

雅而少與人酬唱世無傳焉射藝得妙武夫莫敢爭  
 可謂才兼文武矣常戒諸子曰勿為惡德以忝先祖  
 晚年築驪江小墅為退計以母老不敢決臨終語諸  
 子曰有生必死死何為戚但以老母為念耳且憂國  
 事曰吾則已矣汝等當識之公初娶密陽朴氏主簿  
 薰之女生一女適金可賓奉事再娶李氏宗室廣平  
 副守諱存英之女中義大夫加恩君份之孫也夫人  
 生于 正德乙亥四月十二日己亥配公三十餘年  
 執婦道孔宜事上撫下咸得歡心制產有方雖值育  
 鞠不色憂以無撓公雅志 嘉靖乙丑先逝生四男  
 二女男長曰磬早歿次曰礪武科判官次曰礪察訪

次曰砥進士女長適柳夢彪次適尹希宏皆士人也  
 金可賓生三女一男女長適朴繼禧次適崔五鳳次  
 適申光弼進士男幼磬生二女長適尙著孫縣監次  
 適沈孝謙進士礪生一男曰迷礪生四男一女男適  
 運暹餘幼砥生二男皆幼柳夢彪生二男二女長曰  
 浩餘幼尹希宏生一男二女皆幼葬公之翌年其孤  
 求碑銘于珥珥生也後未獲從公游公之晚年始被  
 容接賞其方物無忤而已他無以窺淺深恐不能發  
 揚幽光累辭而請益確經歲不懈竊思自珥省事以  
 來當國之宰非一二吹噓之力可奪造化病于夏畦  
 者肩相接也未嘗聞公游其門以求捷徑故雖無煥

赫聲不至蹈禍機非恬澹自守能如是乎此可銘銘

皎皎如雪厥或易涅硜硜如石厥或易斲惟其近名  
未能允迪公無驚外涉世從容有熱炙手公濯以風  
有網無隙公不在中委蛇委蛇退食自公巡宣六道  
未見潤屋我謂公清人謂公拙潔無皓色柔無所屈  
易簣何言念母憂國益刻斯銘用闡潛德

知禮縣監 贈參判金公神道碑銘

公諱鎬字叔京光州人新羅末有王子避亂于光仍  
籍焉入麗朝世為大官八代平章公其後也曾祖諱  
國光左議政策敵愾佐理二勳封光山府院君祖諱

克忸大司諫 贈參判光原君考諱宗胤 贈參議

妣靈山辛氏守禹鼎之女以 正德乙丑生公幼而  
業文長而數奇晚而筮仕拜瓦署別提移參禮察訪  
陞主繕工監簿出監知禮縣以 嘉靖辛酉季冬卒  
于官享年五十七以子繼輝貴故 贈吏曹參判配  
全義李氏封貞夫人是正郎光元之女有男四人女  
二人男長即繼輝大司憲次殷輝縣令次立輝別提  
次公輝察訪女長適李欽次適蔡有根大憲子長生  
參奉女鄭起溟縣令女姜燦宋爾昌別提子吉生善  
生蔡有根子泓女尹世貞長生子隱集槃其餘孫皆  
幼公識達氣厚內和外嚴望之偉如也善草隸曉音

律至於陰陽算數琴棋雜技無不通悟才多而能博如此與秋巒鄭靜而同里往還論易理秋巒深歎服之大憲少時善善惡惡名重士林聞公常戒韜晦果被黨禍躓而復起夫人慈和有闡法成就子女賴其教也後公九歲以 隆慶己巳歿甲子一周矣公卒之越明年壬戌二月葬于連山牛頭里先塋之側夫人耐葬于己巳三月銘曰  
學不必祿餒在于耕嗟公抱器身否心亨白首青衫猶試牛刀有子克家維士之髦鬱鬱佳城繫公之藏穆如有辭用發幽光

穩城府使 贈判書瑞原君尹公神道碑銘

公諱士貞字貞之坡平人始祖諱莘達起家佐高麗太祖爲壁上功臣至玄孫瓊邊戎立功官至門下侍中鈴平縣開國伯諡文肅公在我朝諱就官至知密直司事集賢殿大提學是文肅九代孫於公爲高王考曾王考諱救通訓大夫原平府使王考諱洪通訓大夫瑞興府使考諱恭通訓大夫行咸悅縣監以公功進 贈純忠補祚功臣資憲大夫工曹判書兼知義禁府事妣南陽洪氏嘉靖大夫知中樞府事諱任之女也公生於 成化己亥正月十七日登 弘治甲子武科 正德丙寅以軍器寺奉事參 中廟靖國之勳起拜內膳寺主簿戊辰移主司僕寺簿陞平

市署令己巳拜晉州判官庚午禦倭寇有功超三資  
壬申丁外憂甲戌拜茂長縣監二年罷歸己卯拜內  
瞻寺判官遷刑曹正郎俄拜平安虞候庚辰拜端川  
郡守 嘉靖壬午拜 世子翊衛司右翊衛遷訓鍊  
院僉正兼內乘乙酉拜文川郡守丙戌陞通政授穩  
城府使丁亥夏遘疾以五月二十五日卒官享年四  
十九以功例 贈資憲大夫兵曹判書瑞原君 賜  
弔祭以其年九月禮葬于廣州治北拘遷里先塋之  
側公天資軒輊異常自守簡而莅衆嚴倅晉州三年  
吏與妓莫敢仰視迄公去無知公面者雅好儒學迎  
館一文士衙罷必講讀夜分乃寢未嘗以事劇少止

端川產銀守郡者鮮脫汗名公在郡數年不造一指  
環累宰列城所馱惟書籍而已有屋於西湖活計蕭  
然其始築室也公悠然嘯傲不事檢督木工至與役  
徒設博戲而公亦不呵禁也嘗與妻兄弟分財終日  
醉睡不發一言券成只押署而歸其無意於生產如  
此第以恬於勢利拙於求名故宦途多阻位不稱才  
公前娶申氏縣監永綏之女也早世後娶李氏宗室  
茂豐都正摠之女也夫人早遭門禍茂豐被謫燕山  
朝不得令終夫人奉王母致孝每得父母手簡必謹  
藏于懷中時有飛書之變得罪之家不敢畱隻字恐  
爲禍祟王母知夫人懷書迫令付燼夫人掘坎將瘞

竟不忍捨平居撫覽悲慟子孫奉旨既歿納于棺中其配公也得婦道甚訓子女有方視前室子無異己出睦宗族撫婢僕交鄰里恤貧乏咸得其宜勤身節用以贍家業至老不倦俗尚淫祀夫人深惡之巫覡絕迹於門庭惟盡誠追遠雖遇癘疫不廢祀事既老每令諸孫讀內訓聽而取則焉公會以良家女爲妾妾之父將死有寄託之語厥後失公意公將遣歸夫人諫曰受人之託棄之不祥且夫婦之義無間嫡妾今必去之妾亦不敢自安公感其言不去及公卒同廬墓側有終焉之志數年歲飢盜興族黨恐被劫強請還京終于萬曆癸酉七月二十八日享年八十

七其葬與公同塋異室前夫人生三男曰軾輻轅轅登武科後夫人生二男一女曰轍武科縣監曰轅前縣監女適前參奉朴世雄軾無子輻只有一女及妾子轅生二男一女男曰天壽武科今爲僉使曰未壽以未壽後軾奉宗祀輻之壻曰朴玉妾子曰大生轅之壻曰李羣玉轍生三男曰渭溟涉有妾子曰微生涉今爲僉使轅生二男二女男曰惟善早死曰明善生員壻曰李碑申楠有妾子曰枝生朴世雄生一男三女男曰益壻曰元膺文科直長曰柳希津察訪曰朴滬內外曾玄孫見在者五十餘人公歿後五十年子轅求碑銘于李珥公孫涉娶珥姊爲妻通家珥略

知公及夫人行迹梗槩故敢爲銘銘曰  
文昧韜略武困面牆藝用不全短掩厥長矯矯維公  
靡安一曲猿臂發身挾策進學簡以從政清以律身  
勳昭太常愛遺齊民令配善承善積家庭謂公選到  
乃止中齡有種必穫于後毓英誕告雲仍宜視刻銘

正言 贈都承旨金公神道碑銘

陰慶庚午春金公啓出按黃海以例 贈厥顯祖考  
僉正府君都承旨祖妣尹氏淑夫人爰樹神道之碑  
以表 恩命求銘于德水李珥其求也不以文異乎  
人之求也故辭不獲已謹按行狀金氏爲扶寧著姓  
高麗平章事實文閣大學士文定公坵之四代孫知

古阜郡事諱光敘以麗朝世家麗亡大歸貫鄉子孫  
仍家焉郡守生大護軍諱璫護軍生司醢署直長諱  
懷允直長娶延安望族縣監宋光善之女生諱直孫  
字子胤是承旨公也 正統丁巳爲初度之載幼有  
局度長通經史中癸未司馬己丑文科由承文院選  
入藝文館歷官弘文館博士司憲府監察司諫院正  
言兵曹佐郎正郎出外通判慶州守韓山郡爲養慈  
親也還朝拜司導寺僉正以卒壽五十七時 弘治  
癸丑十一月六日也葬于席洞山先塋之側公端慤  
方直惻惻無華持身清白一毫不妄取與治邑以簡  
吏畏民懷見義果決人不可奪慶州時以罪謫府人

因病而斃公曰古人有殺一不辜而得天下不爲者吾安可一日荷居卽自坐所翩然棄歸其無繫累如此時去麗季未遠喪紀紊廢雖士大夫鮮克由禮鄉人尤甚公前後居喪考證典禮一遵古儀情文俱盡鄉人多效之配尹氏系海平府院君碩之後吏曹參判思永之孫司憲府監察登峻之女也性嚴治家循蹈規矩教子女有方養姑致孝承君子以順助成清德 嘉靖乙酉二月三日以疾終壽八十合葬于席洞山有二男一女男長曰錫弘以進士薦遺逸官至郡守次曰錫沃癸酉生員女適進士權士衡錫弘有五男曰瑞雲縣監曰瑞星擢文科階通政曰瑞辰瑞

奎瑞璧錫沃之季子乃啓也以貴榮厥先人有兄三人曰喜善拈銘曰

賦才司命不二其機才豐命嗇莫研厥幾人衆雖勝天定孔微有種子初必穫于終扶安維金累善積功顯顯清譽秩秩家法祥發孝孫 恩自天錫蓄厚施輕未艾厥福

墓碣銘

獻納李公墓碣銘

明廟冲年羣兇罔 聖大鏖士林乙巳以來無寧歲捐紳以知名死者肩相比故獻納李公其一也公諱致字可遠年十九選入太學 嘉靖庚子釋褐由成



均館學諭遷至博士陞戶曹佐郎時 仁廟初陞  
詔使臨境調度絲棼難算公照數無銖兩差吏不敢  
售姦大爲判書所服歷兵曹佐郎咸鏡道都事拜司  
諫院獻納時戊申歲也公素憤儉人得志抗言無顧  
忌入對 啓事聞者悚然已而兩司共劾李芑之罪  
公持論尤力又言外戚不當與政芑與尹元衡聞之  
銜甚未久遞禮兵二曹正郎己酉忠州獄起革州爲  
維新縣銓曹希芑元衡旨託選良吏左授公本縣將  
矚其爲李洪男喪中旣害同氣欲占還籍官之財與  
衰麻日來爭辨公嚴辭却之邑人經變尙告訐有姦  
民造飛語將擠所嗾于不測公與觀察使李濯恐蔓

禍無辜平反其獄洪男誣于芑以故縱芑等始得聞  
嗾兩司誣 啓公及李觀察罪下禁府公時持母服  
守廬被收色不動無一言及家事元衡治獄必欲斃  
諸杖下獄中有疏拒不達公久繫無變辭 明廟命  
減死照律而公已氣盡不復甦時庚戌八月十日也  
春秋四十七九月初旬葬于長湍府弘陵洞從先壟  
也公資俊貌偉望之毅然可想其有守孝友直諒家  
行無缺才周不滯自推步星曆下至百工技藝率皆  
通曉善飲酒能多而不亂居官秉正無回撓惟其剛  
嚴嫉惡不能容人之過故終罹非命公懲於乙巳欲  
棄官歸仁川別墅以母老不決此亦天也高祖諱邊

領中樞府事久典文衡名播中華曾祖諱孝宗黃州  
 判官祖諱璨成均生員考諱自夏積城縣監妣全義  
 李氏嘉靖大夫江原道觀察使繼福之女公娶李僉  
 正麟壽女是星山府院君稷之後也李氏性度端方  
 女則修備公歿待家業無少替 萬曆乙亥正月十  
 五日以疾終年七十一是年三月耐于公墓有二男  
 三女男長曰師聖登文科卒官司饗院正次曰景聖  
 婿曰權倣李慎言鄭錫禧皆士人孫男曰廉序度廣  
 庠是師聖五子景聖之男女皆幼公之嗣孫因公弟  
 都事愾求銘于李珥辭固而請愈切珥念與公同是  
 德水人同祖高麗三司使府君且公死有餘烈不可

無銘遂銘曰

懿其質秀其才天何厚哉富于正隕于邪天胡薄耶  
 厚薄在天公何與焉生未始非辱死未始非榮一片  
 嵌石千古雷馨

內資寺僉正申公墓碣銘

公諱汝樑字士幹姓申氏高靈人高祖文忠公諱叔  
 舟相 光廟勳業載國乘曾祖諱泗以咸吉道觀察  
 使死于李施愛之亂朝廷褒其忠祖文景公諱用漑  
 相 中廟以英才文藝名考判決事諱瀚吏才絕倫  
 娶豐川任氏僉知孟瑛之女以 弘治乙丑二月六  
 日生公于京第判決公之兄參奉諱淙無子以公為

後參奉公娶安東權氏奉事操之女也公以權氏爲  
妣公業儒不第 嘉靖己丑以蔭拜 英陵參奉累  
遷內資寺直長丁酉中進士試是年陞主宗簿寺簿  
歷司評出監陽城縣庚子丁權氏憂癸卯拜監察陞  
軍器寺判官遷司議下判決公憂厥後拜都摠府都  
事陞經歷歷漢城判官中樞都事長興宗廟等令順  
川通川麻田德川載寧五郡守最後拜內資僉正  
萬曆庚辰七月壬辰以疾卒于正寢享年七十六公  
先娶東萊鄭氏主簿勞謙之女文翼公光弼之孫也  
生一男二女男曰祜義禁府都事女長適李復慶次  
適郡守鄭得次適徵君成渾再娶光州金氏從仕郎

純之女文敬公禮蒙之曾孫也生二男二女男曰櫛  
樸皆業文女適學諭姜宗慶次適別坐李穀次適鄭  
之升祜娶判官成子清女生二女長適檢閱俞大進  
次適進士柳夢寅側室男女各二男曰應梧應楨皆  
幼櫛出後再從父司藝汝楫娶縣監尹轅之女樸娶  
縣令安士欽女生男曰應桓李復慶早卒鄭得妻無  
子而天成渾有一男二女男曰文濬女長適南宮賞  
一幼姜宗慶生三男三女男長曰晉暉餘幼李穀生  
一男二女男曰光後女幼鄭之升生二男曰諤曰竝  
姜鄭妻皆先公卒其年九月乙未葬公于楊州金邨  
里與鄭令人同塋異室鄭令人卒於甲午三月享年

二十九金令人卒於壬午正月享年六十六耐葬如禮成徵君自誌公墓求碣銘於其友德水李珥曰外舅少文多質喜怒不遽居家簡儉只守世業不營生產家人亦恥規利在官廉慎務損上益下節用裕財民多有去後思恬於勢利不肯爲趨承之態於廢興榮辱非所汲汲此可應銘法珥曾按海西公宰載寧見其儀朴而事勤固賞其爲長者徵君不我欺也銘曰

克濟其美克守厥家年踰於爵實浮于華徵士作贅有言不阿載鏡于堅百世無訛

宗簿寺正盧公墓碣銘

公姓盧諱慶麟字仁甫系出谷山曾祖諱重禮嘉善大夫同知中樞府事祖諱種石通訓大夫行軍威縣監考諱績以軍職至司果妣豐川任氏內禁衛諱重之女公生于 正德丙子擢 嘉靖己亥別科補太學官由學諭陞至博士歷工刑戶禮四曹郎平安黃海兩道都事司憲府持平掌樂宗簿兩司僉正出拜羅星二州牧使人爲宗簿寺正晚莅肅川府以治狀陞通政越三年以闇昧被人言罷官奪階時丙寅秋也公歸海州田墅有終焉之計 隆慶戊辰春寢疾入京尋醫藥餌無效以四月己亥終于陽德坊第享年五十有三公心慈而守固任情直行不避嫌疑少

與陳復昌相狎復昌貴顯往來途疎人或勸之見公曰遂初所爲不滿人意因此積憾公拜持平被劾左遷陳之爲也羅星爲州地廣民稠詞訟浩繁公莅事精明語不出口而衆務悉辦黠吏豪民莫不心服迄今稱道不已在星時獎儒勸學士多興起乃構書院于雲谷伊川之間以爲藏修之所退溪先生名之曰川谷書院文風賴以益振六期之間屢蒙朝廷褒獎有赫赫聲治肅也大修黌舍具祭器一依禮制遐荒之士亦知慕學公少年登第無同榻講磨之友雖好善愛士而量度峻隘於人少許可且不能隨時俯仰坐此立朝無相推挽者一躓竟不見引手相救者嗚

呼此亦命也娶安東金氏繕工監正諱漢老之女也生三女長則珥之室次適宗室德原守鏡義次適上舍生姜宗胤側室具生二男長曰孝蕃次曰孝順以其年十二月葬于牛耳山麓先塋之南銘曰

繫公質美器別盤錯岷玉其貞非以盡才澆視勢利受厚施薄非以近名嗚呼哀哉

漢城府庶尹洪公墓碣銘

公諱以坤字仲順姓洪氏系出南陽南陽之洪來自中朝爲國大姓在麗朝已盛入我朝有諱吉叟佐太祖策開國勳封南陽君門益昌大卒謚文景於公爲六代祖也曾祖諱循性內資判官祖諱貴孫石城

縣監考諱潤先江陰縣監妣崔氏司憲府監察智成  
之女以正德乙亥生公公有兄早逝父母憐公無  
兄弟不程課以文用是應舉不中嘉靖戊申公年  
三十四試武藝除部將調主軍資簿出監青陽縣自  
此歷內職者曰司導宗簿主簿造紙司紙司憲監察  
繕工濟用判官忠勳都事司饗僉正掌隸司議漢城  
庶尹莅外邑者曰南原判官載寧遂安高陽旌善安  
山祥原六郡守萬曆壬午三月六日以疾卒享年  
六十八是年五月二日葬于楊根馬落巖亥坐巳向  
之原在先塋側公天資寬厚氣度夙成不學而自能  
制行十八遭父憂執喪毀瘠見者傷之二十七丁母

艱哀敬遵禮慮考墓有水氣將移兆窮無物力自牽  
車牛奔走營葬具深墨羸瘁僕隸感泣鄉鄰憫其誠  
出力相助乃遷卜燥原以妣耐舊墳果有水孺慕久  
而愈篤至練自斷季指埋于墓前喪畢別造考妣位  
牌安于淨室朔望必參出入必告雖不酌禮非真孝  
則不能也姁崔氏歿移兄墓就耐以避濕自傾其財  
設衛豎碣兄子鳳祥主先祀案盛器皿多自公辦經  
理不翅若己家故公若失祿人必先唁鳳祥與姊妹  
及鳳祥分家財推美占惡同氣相友人無間言事姊  
無異於事母焉居官勤於吏職館廨必修倉庫必盈  
不喜媚民于譽雖無赫赫聲去後必見思形貌魁偉

髯長過腹望之知其爲長者常以司饗提舉進膳于華使華使注目其從者拱手起敬所莅吏民欽仰風義不敢弄以事與物無忤有犯不較而亦未嘗怵於權勢尹元衡是公從表兄也州郡歲時輦賂狼藉公有禮遺不過直百鈔元衡駭其簡示族黨以傳嗤焉在載寧時元衡奪其郡人家富奴要沒其財奴籍其大半不肯盡納元衡囑公殺奴公不從又嗾方伯必殺公牒以實竟得免死及元衡敗奴訴法可併免悉陳其狀憲官咸歎異之本郡水軍有防花梁鎮者公已調遣水使私放御史點闕水使抵言初不就防公若自明水使罪叵測公於水使無契而乃曰我非只

罷何忍置人重律遂引咎落職以恤其急公於國恤行素必限卒哭遇國忌不問遠近不設肉其性然也不事畦畛不爲皎皎之行而不營產業每罷官則家食必窘或至鬻馬猶周親黨之急性且好潔居處鮮明几屏齊楚客至必設酒食人不覺其貧也臨終怡然歸順無嗟羞之容此又所難也公娶司園金石璘女克配厥良先公二十六年而歿附公同兆有二女二男女長適金仁甲今爲察訪次適李碑無後而夭男曰龜祥致祥龜祥娶縣監趙廷幹女生二男三女男曰達海進海致祥己卯進士娶經歷趙琇女生一男三女男曰宗海諸女皆幼金仁甲生六男三

女男曰時訥時諒時訓時說女適趙承孝餘幼龜祥  
 兄弟撫公之遺授狀于珥求碣銘公於珥先君為內  
 弟珥自幼飽見先君外家最睦公事姑甚勤撫珥有  
 恩愛珥是一家人也茲不忍辭第饒堅之文不能詳  
 而以槩銘曰  
 物蘊必發水鍾必溢在古不差在今不忒故以內資  
 之真醇石城之廉潔江陰之純明比三世不達嗟公  
 質懿克紹家業順乎外恢其中孰云止乎百里是劬  
 是壽俾後人兮受祉

奉教李君墓碣銘

李君名嶸字仲高系出國氏太祖大王第三子

益安大君諱芳毅七代孫也曾王考副護軍諱益蕃  
 王考戶曹佐郎諱璋考司僕寺正諱彥怡妣德水李  
 氏承義副尉諱元禎之女左議政諱衍之孫也君生  
 于嘉靖庚申九月某甲歿于萬曆壬午五月某  
 甲年二十三越某月某甲葬于某地娶主簿尹世亨  
 女生一子幼君生而穎悟學不勤師弱冠已通經傳  
 大義十六歲厥考疾革君顛天悶絕斫指骨為藥  
 創重幾死居喪盡禮事母誠文俱至事兄得弟道孝  
 友稟於天者如此二十一歲擢第明年選入藝文館  
 例陞至奉教君識度夙成發軔趨正衆論膠擾必主  
 乎善朋儕推重咸嘆不如也秉筆入侍因事敷奏明



辨 上材之曾從珥及成徵君渾有所質問操戈入室珥與成君樂其相長且才堪壯行期以遠器嗚呼短命死矣士林固惜悼而余二人之慟尤深矣銘曰錫之以英才畀之以彝行若將栽培胡一朝之不幸我衣無華我佩無光九原有人君孰與之翱翔一丘幽宅四尺其崇有骨不朽赤氣射乎秋穹

贈參判朴公墓碣銘

公諱世貞字國正高靈人遠祖諱之順仕高麗以征討有功爵大將軍七傳而至戶曹佐郎諱持是公高王考曾王考諱秀林交河縣監王考諱始孫 贈通禮院左通禮顯考諱諶 贈承政院左承旨顯妣陳

氏山陰縣監猷之女公生于 弘治壬子二月六日

歿于 嘉靖壬子正月十九日甲子一周公性醇而行遜與人無忤隱德不耀以子漸貴故加 恩三代贈公吏曹參判先夫人長原黃氏縣監純之女領議政烈成公守身之玄孫有二女長適金廷秀先公俱夭有孫曰金誅次適兵使金軼無後後夫人安東權氏大護軍權澄之女贊成事文忠公權近之後也甚得婦道與公同月而歿有二男長則漸今為黃海道觀察使次曰潛今為長興庫主簿側室子曰清漸有男曰定生女適士人尹汲妾子男女各二男曰繼生應生女幼潛無嫡子妾子四男二女男長曰定壽餘

皆幼公墓于揚州治東神穴里以後夫人附銘曰  
高靈之朴胤曹蟬聯逮于戶曹清白相傳交河通禮  
爰暨承宣濟以廉潔式爲世業公趾厥美終于家食  
有煦斯燾令子克發餘慶未艾孰種無穫鬱鬱神穴  
四尺有碣載鑱厥迹用焯潛德

宣務郎朴公墓碣銘

珥友成徵君潭狀竹山朴君之行求碣銘于珥珥曾  
知朴君長者軒豁無拘礙好善慕義出入聽松先生  
門下甚密重然諾喜周急法宜得銘謹按朴氏爲著  
姓有諱奇悟始顯於高麗有三韓功臣三重大匡君  
其十八代孫也曾王考諱晏行价州郡守王考諱松

秀龍驤衛護軍

贈通政大夫東萊縣令考諱勳武

科慶州判官娶慶興府使王懋女以

正德壬申閏

五月甲戌朔生君子京第君諱宗文字奎甫因父緒  
學武天資孝友十七丁內憂致哀過人判官公晚歲  
休官就坡江石壁別業老焉君侍養不離跬步遂廢  
舉業 嘉靖丙午喪考號絕水漿不入口三日廬墓  
側躬饌具啜粥三年以宅兆占高峻憂其圯運石成  
丘手栽梓樹鋤壟草朔望必薦鮮肉將練祭之夜虎  
置獐廬後人稱孝感與二女弟分產只取墓下田餘  
悉與女弟遂居墓下終身堂內設考妣位事之如生  
祭不許女弟輪設憫女弟之窮每歲中秋躬詣京迎

歸羣甥畢至漁獵共飽雍雍一堂至冬躬送還京以爲常經理女弟家務不翅己事得一美味必走僮分遺恩愛之篤人嘆其不可及與人無忤雖對細民色溫言慈強暴者亦服居有江湖樹林之趣君自娛其閒無一點塵俗態客至不問有無設酒食談謔爲樂而其中有守視人乾沒利途者藐如也同處者不敢以鄙事相示君旣不求聞於世人亦鮮知者不霑一命只以考蔭階至宣務郎乙丑正月丁巳以疾終享年五十四越三月己未葬于其居之東二里許坡平山麓乙坐辛向之原先塋在西百餘步君娶珍山副守倫之女後君十四年而歿就君塋合葬君無嫡子

有孽子男三女二男曰信佑信信母賤不得嗣家佑信卽良家徐氏出也女適惠民署前銜趙夢男一女未行信與成君及珥同里情熟殫力具石將表墓道故文出於吾二人之手銘曰

學由乎人資出於天人鮮琢磨天不變遷嗟君孝友得之自然峩峩章甫莫追下風人亦有言學問無功不耘求秋咎豈在耕儻以君資鑽仰孔庭天人匹休孰敢與京幽馨恐沈礫石鏡銘

淑人宋氏墓碣銘

故金堤郡守鄭侯諱承周妻淑人宋氏籍恩津高麗正順大夫版圖判書訖之後也曾王考諱有禮王考

訓鍊院參軍諱元商考保功將軍司果諱文夏家在公州淑人纔笄歸同鄉鄭家承舅姑事君子有閨範天質溫美不待學而暗踐迹焉郡守之歿卜兆丘宅日瞻望號慟制終猶奉主如初喪親具奠朝夕上食如是者三十年衣素表哀終身不變姑崔氏從長子進士居周在水原淑人躬備寒暑衣服節物異味以忠養無異在側其孝烈如此生于弘治甲寅歿于萬曆丙子享年八十三越三月十三日克襄于雞龍山大草洞與郡守同丘異穴有子男三女一男曰長生季生晉生皆事儒學惟晉生得升上庠長生一男曰雲季生生五男一女男曰霖霽霖霖晉生生

二男二女男曰霧一幼壻士人李震生一女內外孫凡三十餘人晉生與珥同年具誌文求小礪陰記珥謝不敢請累年不懈益勤庚辰季秋珥在坡江晉生徒步遠來吐辭益悲珥不忍拒因其誌隳栝系以銘曰  
惟資之粹得諸天惟行之懿格諸神豐于積蓄于施以貽後人

栗谷先生全書卷之十七

